

# “Anìn!”, il manuâl di lenghe furlane pe scuele primarie

dât fûr ai gnûfs arlêfs des classis primis e tiercis



ARLeF  
AGENZIE REGIONAL  
PE LENGHE  
FURLANE

**Anìn! al è...  
Il prin manuâl par  
insegnâ la lenghe  
e la culture furlane  
inte scuele primarie**

Intai dîs passâts a son stadis consegnadis gnovis copiis di “Anìn!”, il manuâl par insegnâ la lenghe e la culture furlane, a ducj i ples di 60 Istitûts comprensîfs e aes Scuelis paritariis des ex provinciis di Gurize, Pordenon e Udin. La consegne e je stade destinade ai gnûfs arlêfs des classis primis e tiercis dal an scolastic 2023/24, che i lôr gjenitôrs a àn aderît al insegnament de lenghe furlane. La distribuzion dai volums si è zontade a chê fate tal 2022, cuant che, pe prime volte, passe 20 mil arlêfs iscrits al insegnament de lenghe furlane a vevin ricevût il manuâl. Il manuâl “Anìn!” al è un projet realizât de ARLeF-Agenzie regionâl pe lenghe furlane cul supuart de Regjon Autonome Friûl-Vignesie Julie, par meti in vore la leç 482/99 (Normis in materie di tutele des minorancis linguistichis storichis) e la leç regionâl 29/2007 (Normis pe tutele, valorizazion e promozion de lenghe furlane).

“Anìn” al è stât publicât tal 2022 cu la colaborazion de cjase editore Edizioni didattiche Gulliver: al rispiete ad implen il Plan aplicatîf di sisteme pal insegnament de lenghe furlane de Regjon e al va daûr des Liniis vuide dai materiâi didactics pal insegnament dal furlan a scuele fatis buinis de ARLeF.

“Anìn! 1” (pes classis prime e seconde) e “Anìn! 2” (pes tiercis, cuartis e cuintis) a son i prins sussidiaris realizâts di pueste par che i students de scuele primarie si svicinin ae marilenghe, par scuvierzi il furlan, lis particolaritâts dal teritori dal Friûl, la sô storie e la sô culture. Se cul prin volum i arlêfs a cjapin sù in maniere graduâl la competence comunicative orâl e une prime capacitât di leture e di scriture de lenghe, cul secont volum si rive a aprofondiments, simpri graduâi, des competencis linguistichis ma ancje de storie e de gjeografie dal Friûl, intune logjiche interdissiplinâr e interculturâl daûr dal program CLIL (Content and Language Integrated Learning). Dut chest, cence dismenteâ la dimension plurilengâl che e cjape drenti l’inglês, il talian e chês altris lenghis feveladis sul teritori regionâl.

Al projet a àn lavorât plui di cuarante personis, coordinadis de professore Rosalba Perini, e par realizâlu a son coventâts passe trê agns di lavôr.

Lis tantis imaggjins tai volums a son stadis metudis a disposizion cun gjenerositât di istituzions, museus, ents locâi e privâts di dute la regjon. “Anìn! 1” e “Anìn! 2” a vegnin dâts fûr in maniere gratuite, e ae fin dal cicli scolastic a restaran aes fameis dai arlêfs.